

Saturday, February 22, 2025

Time - 2:30pm - 2:35pm

AKASHVANI AIZAWL

REGIONAL NEWS UNIT

TUIVAI BRIDGE

Mizoram leh Manipur inkal pawhna Tuivai lei chu vawiin khan Chief Minister Pu Lalduhoma’n a hawng.

Chief Minister hian Tuivai lei bul, Bridge Site ah Ribbon chep chatin Tuivai lei hi a hawng a, he hunah hian PWD Minister Pu Vanlalhlana pawh telin Bialtu MLA leh Leader of Opposition Pu Lalchhandama Ralte in an tel pui a, Hmar Inpui Gen Headquarters atangin thusawi ngaihthlak a ni bawk.

Chief Minister Pu Lalduhoma chuan Mizoram leh Manipur inkal pawhna Tuivai lei dawh zawh ani chu lawmawm atih thu Instagram account kaltlangin alo sawi tawh a, sawrkarna an chan hnua Manipur lam unau harsatna tawk mek ten mamawh an thlen hmasak ber chu Tuivai lei dawh ani tih sawiin a hmunah a tlawh a ti a, feet 200 a thui Bailey Bridge dawh turin hma an la nghal tih a sawi.

Nikum March ni 13 atanga dawh tan niin February thla tir lam khan dawh zawh tawh niin enchhin tawh a ni a, Lei hi a rinawm tawk em tih enchhinna atan hian Truck lian (Hyva) hman a ni a. Lei hi Ton 20 ai a rit zawhpui loh tur a ni a, PWD chuan hei hi zawm vek turin mipui an ngen a ni.

Tuivai lei Bailey Bridge hi Feet 200 a sei niin Mizoram a Bailey Bridge sei ber a ni a, Nikum March ni 13 atanga dawh tan niin February thla tir lam khan dawh zawh a ni a, Mizoram leh Manipur lam, lei bul thut kawng siam that fel ala nihloh avangin a hawn hun hi sawn tlai deuh niin Lei hawn hma chu PWD lam hian zawh an remtilo a, Manipur leh Mizoram inkalpawhna kawng pawimawh tak anih dawn avangin Department lam pawhin an uluk hle a ni.



CM LALDUHOMA BIRTHDAY

Vawiin hi Chief Minister Pu Lalduhoma piancham a ni a, Chief Minister 76 tlin lawmna pual hian Prime Minister Narendra Modi leh ramchhunga hrulaitu hrang hrangten piancham chibai an buk a ni.

Prime Minister Narendra Modi chuan “X” kaltlangin Pu Lalduhoma piancham chibai hi a buk a, hrisel leh dam taka hun hmang chhunzawm zel turin duhsakna a hlan a ni. Union Home Minister Amit Shah pawhin Pu Lalduhoma hi piancham chibai a buk a, mipuite tana tha taka hna a thawh zel theih nan duhsakna a hlan a ni.

Minister of Road Transport & Highways Pu Nitin Gadkari pawhin Pu Lalduhoma piancham lawmpuinan “X” kaltlangin a sawi a, Minister of Ports, Shipping & Waterways Sarbananda Sonowal leh Parliamentary Affairs Minister Kiren Rijiju pawhin piancham chibai an buk bawk a ni.

Pu Lalduhoma hi thenawm state Assam leh Arunachal Pradesh Chief Minister te pawhin piancham chibai an buk a, Mizorama tana a hnathawh te chu chhuanawm antih thu leh mipui tana thawk chhunzawm thei tura hriselna nei zel turin duhsakna an hlan a ni.

Pu Lalduhoma hi kum 1949 February ni 22 khan Tualpui khua ah alo piang a, kum 1977 khan Indian Police Service ah inziak tlingin kum 1984 thleng he hna hi a thawk a, heta tang hian ram tana ke pen tanin Mizoramin remna leh muanna a neih theih nan theihtawp a chhuah a, MP te niin MLA ah pawh vawi tam tak thlan tlin alo ni tawh a, kum 2023 inthlanah ZPM chuan sawrkarna siamin hetah hian Pu Lalduhoma chu Mizoram Chief Minister 6-na ni turin December ni 8, 2023 khan rinawmna thu tiam tira lakluh a ni.



E-RAM PORTAL

Land Revenue & Settlement department awlsam taka mipui-in an dawr theihna tur online service portal, e-ram ti a vuah chu hman theih a ni tawh a, Aizawl District bikah inhmun dilna hrang hrang chu online hmang chauhin dil theih a ni tawh dawn.

Land Revenue & Settlement Department chuan thuchhuah siamin e-ram portal an peih fel tawh avangin inhmun dilna hrang hrang (house pass, periodic patta, land lease te chu online hmang chauhin dil theih a ni tawh dawn an ti a, Mimai a online-a dilna theh lut theilo te chuan mahni awmna atanga hnai ber Common Service Centre (CSC) atangin CSC user fee Sawrkarin a bithliah pein dilna an thehlut thei dawn tih an sawi bawk.

Hemi chungchangah hian Chief Minister Pu Lalduhoma chuan sawrkar leh mipuite inkara indawrna awlsam zawk, hun leh tha heh lo zawk, rang zawk leh huapzo zawk anih tur thu nikum November thlaa e-Ram portal a hawnna ah alo sawi tawh a, ram buai tam takte rang zawka ngaihtuahtu tur Revenue Court siam a nih dawn thu leh surveyor indaih lohna avanga mipui harsatna sutkian na’n empanel survey firms system an kalpui dawn tih sawiin Aizawl district Settlement pisa chu mipuite mamawhna avangin Aizawl North leh Aizawl South ah then a ni dawn a ti bawk.

He e-ram portal hi Ministry of DoNER, Science & Technology Section sum cheng vaibelchhe 6 leh nuai 4 atanga thawh niin, a bul tan na’n hian pilot project angin Aizawl district hnuai a ram chhinchhiahna (land records) leh thil kal mekte kalpui phawt a ni dawn a. In hmun dilna, periodical patta, land lease, house site leh hming thlakte a bul tan a ni ang a. A tahtawlin Revenue Department service 27 te chu he portal-ah hian bilh tel vek tura ruahman a ni a. A portal hmang thiam lo te tan Common Service Centre (CSC) kal tlanga hman theih a ni dawn a ni.



AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Zanin dar 6 leh a chanve-ah Chanchinthar hi puan leh a ni ang.



PM MANN KI BAAT

Prime Minister Narendra Modi chuan naktuk Pathianni chawhma dar 11 hian 'Mann Ki Baat' programme-ah ram chhung leh ram pawn mipuite hnenah thu a sawi leh dawn a, Tun tum ami hi a tum 119-na tur a ni ang.

He programme hi Akashvani leh Doordarshan network pumpui, AIR News website leh Newsonair mobile app-ah te tihchhuah a ni ang a, AIR News, DD News, PMO, leh Information and Broadcasting Ministry-a YouTube channel-ah live-stream a ni bawk ang.

